

LIBARS... DI CE?

Ai 3 di avrîl, chei che a àn a cûr il Friûl vêr a àn di fermâsi un credo a ricuardâ ce che al è sucedût in chês stesse dì tal lontan 1077, cuant che un grant imperadôr, premiant la fedeltât di un patriarcje cussient, al à segnât il principi uficiâl dal Stât furlan, colât sot des sgrifis di Vignesie un 350 agns daspò.

Fermâsi par ricuardâ il lunc troi di cheste nestre tiere gloriose e martare, grande e sfurtunade; di chest popul che al à savût dâ tancj spiêi di virtût e ancje tancj moments di strache e sfiniment. Un popul che al à simpri vût il sens de storie a nivei di sengul o di famee o di paîs ma che salacôr nol à cjalât masse in là dal so cjampanili, vadî a la storie de sô Patrie. Un popul tant bon che salacôr al è stât bon di dî di sî masse voltis.

In chel an di balfueriis jenfri Rico IV e Grivôr VII, o vin vude la furtune di vuadagnâ une libertât che si é rivelade te grande istituzion de "Patrie", tal so Parlament, tes sôs Comunitâts, te armonie ugnule di glesie e di paîs, di pastorâl e di spade, di religjon e di patrie. Cuant che i patriarcjis, in non de libertât, no levin a confessâsi di vê cjadade in man la spade; cuant che lis autoritâts civîls, simpri pe stesse libertât, no ur pareve di pierdi prestigjo sentantsi a cuistionâ insieme cul gleseam. E il popul al à podût gjoldi un salustri, masse curt!, di libertât.

Ce grant non la libertât e ce tant che le àn te lenghe chês che no le vuelin te vite e ce pôc che le bramin chês che no le cognossin!

Se, tal ricuart di chês ete, o varessin di domandâur ai passe 700.000 furlans di vuê ce fin che à fate cheste libertât, la pluritât a rispuindaressin, impreteribil, che no vin mai vude tante libertât come cumò.

Nus al predicjin in glesie che, stant cun Rome, o sin te veretât, sûr de libertât. E lu disin propit i nevôts di chês che a àn sassinât il nestri Patriarcjât di Aquilee par no che ur ves fat ombre al lôr.

Nus al contin in scuele che, par sgorneâ Austriacs e Mucs, ancje in grazie de resistance, cumò o vin la libertât de republiche democratiche taliane che nus à nomenâts vuaitis dai siei distins fatâi. Propit chês scuele che e vares di contâ la storie come che e je sucedude e di dînus che cheste Italie e je storicamentri la piês di ducj i parons che o vin vûts; chês Italie tant sigure dal nestri tornecont a stâ sot di jê che nancje no i ven il scrupul che o podaressin dîsji «vonde!» a lis sôs fusetis e bombis e casermis e robariis e porcariis e scandui e ingratitudin. Che e à savût dome molginus e coionânus; spelânus di ogni bande e sghignînus sore.

Ma se si fâs un discors dal gjenar, i furlans stes no lu capissin e no lu acetin. Parcè che ju àn tant ben imboconâts che a crodin plui te unitât taliane che no tal Eterno Pari e a scoltin plui i galopins nostrans di Rome che no i profetis che a scombatin pe lôr libertât.

O sin un popul di cjocs. No dome di vin, che chel al sarès il mancul. O sin cjocs di bufulis e pantianis e sflocjis, e lis parin jù tant che il sîr, cence dî bee. Nus àn tant benon imbussulâts che il lôf talian lu cjapin par agnel e i spalanchin la puarte e l'agnel furlan lu spacin par lôf e lu judin a fâlu fûr. E chêi che a varessin vût di sveânus, di cjantâ al prin cricâ da l'albe, a àn tasût e a tasin, par che o durmedin di plui.

E lis vuaitis, che a varessin vût di stâ in paise par visânus a pene che si sintive a scarpetâ il nemî, si son impisulidis o a àn fate frae cul nemî o a àn cjalât dome di une bande (e sbalgjade ancje chê) o i àn mostrât lôr il troi a di chel che al rivave a fiscâ la tiere furlane.

E po o sin un popul strac sfinît e rassegnât. Salacor par un miscliç di religjon e di naturâl, sta di fat che o lassin masse lâ l'aghe in jù e il fum in sù. I nestrîs stes proverbis, struc de sapience e esperience ingrumade tai secui, a pochin plui a cessâ che no a lâ indenant, a stâ fêrs che no a ripiâsi, a cjapâlis e tasê che no a ribelâsi. Furtune che in ogni moment de storie and è cualchidun che al ten impiade la lum, che al cjante magari tal desert, che al bae e al vise dal pericul. Popui come il nestri no si fasin grandis sflameadis ma la bore e dure une vorone e e pò dâ un segnâl di vite cuant che ducj a scometaressin che il fûc si é distudât par simpri.

Se il cavîl dai grancj nus à dade une man in chê volte, cui à dit che tancj cavîi dai grancj Stâts e partîts e ideologjiis che si viodiju ogni dì cressint no puedin dânus un altri lamp di libertât, un âltri 3 di avrîl che al vedi un savôr sù par jù di chel dal 1077? No podin e no volin crodi che chest çoc, vieri di secui e secui, nol sedi plui bon di butâ fûr un sfiol di libertât par une gnove vierte. Ancje se, lu disin cun passion, Sigjearts cun golet o cence par cumò no 'nd è in viste.